



Elmar Fallet – ün dals megliders tregants da pistola in tuot il Grischun. Cha'l sajettar nu saja insomma ingün'art – l'art es da far adüna il listess e tocker adüna il nair.

fotografias: Dario Müller

Ingün tun dadour il nair

Sco pro la Festa federala da luotta daja eir pro la Festa federala da tir in tschertas disciplinas raínas e rais. Ün tal titel manca amo ad ün dals megliders tregants da pistola in tuot il Grischun, Elmar Fallet da Müstair. Cuort avant cha sias concurrenzas da qualificaziun han lö a Cuaira, ha la FMR visitä al tregant da pistola paschiunä.

Quiet e focussä tira il tregant da pistola Elmar Fallet da Müstair tun per tun seis program da la saira. Id es il «Match-cup», ün tir chantunal sün 50 meters ingio chi's tira üna jada al mais e chi düra tuot la stà cun ün final dals megliders tregants grischuns in settember a St. Antönien. Tuottafat cuntaint culla saira nu para Elmar Fallet dad esser.

«Sch'eu guard uossa il resultat nun esa uschè mal, ma las serias sveltas nu sun idas uschè bain», analysescha Elmar Fallet ils «acceptabels» 570 puncts ch'el ha trat quist mais, congualond culs «excellents» 580 puncts da l'ultima jada ed agiundscha riond cha forza haja quai da chefar cul squitsch da la visita da la FMR.

Adüna trar per guadagnar

Savair ir intuorn cun squitsch, pel pair da 55 ons insè ingün problem. Elmar Fallet vala nempe sco ün dals megliders tregants da pistola in tuot il Grischun. Ed eir sur ils cunfins grischuns oura as saja fich bain chi ch'el es. Ch'el nu giaja a concurrenzas però nimia sim-

plamaing be per trar, dimpersè adüna per tillas guadagnar, accentuescha il tregant da pistola paschiunä. Ed uschea ha Elmar Fallet pudü ramassar fingiäblers titels e bleras medaglias dūrant sia carriera.

Sco per exaimpel üna vainchina da titels sco champion grischun, la victoria culla gruppa da match grischun a la Festa federala da tir i'l Vallais dal 2015, il titel sco champion svizzer dal 2017 a Thun e be pel nair da l'ungla nun haja bastü pel titel dal rai a la Festa federala da tir a Lucerna dal 2021. Implü ha il tregant da Müstair survgni fingiä quat-

ter jadas la distincziun sco tregant grischun da l'on.

«Ils Fallets sun forse ün zich sco ils Tomaschets illa Surselva. Eu n'ha schon survgni quist dun in chüna», manaja Elmar Fallet, guardond inavograd sün üna carriera chi ha cumanzà insè magari tard.

L'art da far adüna il listess

Fingiä adüna fascinà dal trar cul schlup-pet, ha Elmar Fallet pür dal 2009 chattä la via pro'l sport da trar culla pistola. Però uschè tard sco cha sia carriera sco tregant da pistola ha cumanzà, uschè svelt

es gnü il success. Be gūsta trais ons davo ch'el vaiva cumanzà a trar culla pistola, ha Elmar Fallet pudü guadagnar il tir chantunal a Tusan.

«La carriera es statta, pel trenamaint ch'eu fetsch, bod na da crajer», resümescha il pair da vachas svesa eir adüna darcheu ün zich stupefat da quists ultims ons. «Il trar sülla schaiibia es per mai pudair invlidar ils problems dal minchadi. Tü stoust invlidar tuot ils problems per pudair far ün bun resultat. E quai es il bel.»

E per cha quai funcziuna lura eir adüna uschè sco giavüschà, douvra tenor

Elmar Fallet ouravant tuot üna buna fitness, ün man quiet, üna buna controlla da flä e buna coordinaziun tanter tscharvè e daint. E cha lura nu saja il sajettar «insomma ingün'art – l'art es da far adüna il listess», quai chi ha nom per Elmar Fallet: «Tocker simplamaing nöglia dadour il nair!»

Tun per tun – tir per tir

E tenor quist princip tira il tregant da pistola Elmar Fallet fingiä daspö var 17 ons tun per tun – dūrant indombrablas sairas, saja quai i'l stand da tir a Müstair obain lura in tuot ils oters stands da tir, dalöntsche e dastrusch, dūrant concurrenzas regiunalas, chantunalas o sco uossa apunta concurrenzas federalas.

La festa da tir federala chi ha lö quists dis a Cuaira e contuorns es ün dals puncts culminants per mincha treganta e mincha tregant, uschea eir per Elmar Fallet. Quai chi vala pels luottaders la Festa federala da luotta, vala pellas tregantas ed ils tregants la Festa federala da tir. Eir quia as poja nempe dvantar in tschertas disciplinas raína e rai – üna da las distincziun las plü onuravlas chi manca amo illa vaidrina da medaglias dal tregant da Müstair.

Cha nervus nu saja el amo, manaja Elmar Fallet tuot calm. Cha'l prüm üna jada saja il böt da far ün bun resultat pro las concurrenzas da qualificaziun chi han lö quists dis e cha lura cumanzarà, in vista a las rondas finalas in lügl, eir pro el a batter il cour planet ün zich plü svelt. Però, cha tuot saja a la fin finala eir quista vouta avert, conclüda il tregant da pistola paschiunä la saira mani-ond per finir: «Vairamaing esa simpel. Tü stoust simplamaing esser l'ultim il meglider.»

Dario Müller/fmr



Our da lain e marmel nascha art

Dūrant quist'eivna ha lö il 32avel simposi da sculptuors e sculpturas internaziunal a Sur En. Las partecipantas ed ils partecipants derivan da pajais sco Ecuador. Armenia, Giapun o Nouva Zelanda, mo eir da la Svizra e dals pajais vaschins. 16 persunas lavuran

actualmaing cun lain e marmel sül areal da camping suot tschèl avert. Our da tocs inters sun nadas figüras e fuormas creativas. Hoz a partir da las 15.00 vegnan las lavuors expostas al public, a las 17.00 segua la valütaziun dal premi dal public. Quel es dotä

cun 500 francs. Tenor l'organisatur Wolfgang Bosshart ha il simposi da sculptuors e sculpturas internaziunal a Sur En survgni üna tscherta reputaziun ed attira minch'on ad artistas ed artists da dalöntsche e dastrusch. (fh)

fotografias: Fadrina Hofmann